

Wo d'Puure go demonstriere send met erne Traktore
do heige d'Migro ond au de Coop en huffe Umsatz verlore
ond wosi zuefällig of em Heiwäg den dors Riniker Neuquartier crosse
rüeft de Strosser er send d'spot euse Lade esch scho 3 Woche gschlosse

Bem Schuelhusombou s'letschte Johr do hani mech gfrogt bigott
wiso me trotz Platzmangel det be de Flachdächer bliebe wot
jetz hött do ändli schaltets mer do chani der Grond erfasse
beme Flachdach bestoht jo kei Gfohr das em Hueber Ziegel ned passe

Ich ha doch schoweder e Wuert e mer vom Chopf bes zo de Füüsch
well du hesch mech Ueli Achermaa als Gmeindamme schoweder enttüsscht
s'letscht Johr mach ich äxtra en Värs öber de woruf du e de Ferie besch
ond das Johr machi e keine ond scho hocksch weder do am Tesch

S'letschte Johr er glaubeds ned do gheyt mer de Lade abe
woni ghört ha das`si em Ibärg hend en alti Ruine usgrabe
jetz hämmer scho e Ruine dert hend ond kein Schwein seit en Satz
ond mer send äxtra no eini go boue obe of em Schuelhusplatz

Euse Melchior als Bondesrot das wären gsi de Hammer
kei Purredemo me en Bärn ond au kein Melchpriesgjammer
doch wonner de nei seit zor Kandidatur do hani so dänkt em gheime
mues de jetz wöckli so störrisch si we ame sin Esel deheime

Wenn mer ame do die Helge zeichne gets dere wo abverheye
die gsänd den us wie moderni Konscht dromm duenesi ned fortgheye
nei die geb ich denne eusere Gmei die chönndsi den verwännde
als Entworf för es Beld ad Schuelhuswand oder för en neue Kaländer

He was machsch do hani min Nochber gfrogt ond be ganz irritiert
wo de si Frau ond Chender födleblott en Dachständer ufe bugsiert
jetz fahr er met sim Auto ed Wöschalag nänei er düeg de ned öppe spenne
aber be eusem neue Wasserzeys do legi s`Dusche dehei nömm denne

Jo du wäg dem Göggelchrieg han ich nor welle säge
chömed gänd enand doch d`Händ ond düend euch weder verträge
liebe deinen Nächsten stoht doch e de Beble gschrebe
er müends nor ned we euse Pfarrer grad go übertriebe

Woni chörzlech met mim Hond zo sim Stammbaum be gloffe
do hani sone vornehme Snob os de Brogger Altstadt atrofte
de luegt zersch mech a den min Hond ond den de Baum die Eiche
ond seit mer z`Brogg mer händ halt Chlötz wo d`Hönd chönnd aneseich

10 Johr nach dem er zue gmacht het esches ändli sowit cho
ond mer het euse öber 100 Jährig Hersche en Ordsbeldschotz ufgnoh
ond den so e ca 150 Johr ich danke scho chli vorus
do passiert dank s`glich a de Bronnmattstross met em rote Hus

Ich weiss liebe Gmeirot er händs guet gmeint ond eigentlich sett`me euch lobe
das er die 2 Bäumli händ setze lo do em Hersche obe
nor müend die jetz leider weder ewäg das chani garantiere
well die z`Aarau obe jo neuerdengs kei bruni Stämm meh akzeptiere

Bem Strossebou sinerzyt het euse Gmeirot falsch programmiert
sosch hätter statt de Oberdorfstross zersch Dorfsteig saniert
den hätte mer det die Bsetzistei wos nömm brucht das chaschter danke
occasion no zom halbe Pries de Brogger Altstadt chönne schänke

20 Johr Komedi best of :2

Wänd er me bsueche? Ich be dehei onder „www.komedi.ch“